

Regional News Unit AIR Aizawl
Saturday, March 08, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- President Draupadi Murmu-i chuan vawiin International Women's Day pualin mipuite chibai a buk
- State hruaitu ten Khawvel pum huap Hmeichhiate Ni (International Women's Day) chibai an buk.
- Chief Minister Pu Lalduhoman Mizo pi leh pu te nunzemawi chhawmin tunlai thangthar ten, social media hrang hrangah te tawngkam hawihhawm hmang se a ti.
- Union Home Minister Amit Shah-a chuan Tamil tiamin tualto tawng regional language ti hmasawn zel turin sawrkarin theihtawp a chhuah thu a sawi.

<><><>

PRESIDENT

President Draupadi Murmu-i chuan vawiin International Women's Day pualin mipuite chibai a buk. Pi Murmu-i chuan International Womens's Day chu hmeichhiate thawhrah ropui tak tak pholan ni leh ram leh khawtlang tana an thiltih chawimawina ni a nih thu a sawi a. Hmeichhiate chu chhungkua,khawtlang leh ram innghahna bulthut an nih thu sawiin kawng hrang hrangah harsatna tawh mahse an theihnate ropui takin an lantir tawh tih a a sawi a. Hetihruah hian hmeichhiate dinhmun dawmkang turin tihtur tam tak a la awm thu President chuan a sawi a. Hmeichhiate him leh thlamuang taka an khawsak ve na tur khawtlang nun siam turin President chuan mi zawng zawng a sawm bawh a ni.

<><><>

INTNL WOMENS DAY

Khawvel huap Hmeichhiate Ni (International Women's Day) vawiin hian hmeichhiate tana kawng sial pawimawhna inzirtirna hun hman a ni anga,

Mizoramah pawh he ni hi ngaih pawimawh a ni a, Minister Pi Lalrinpuii chuan Zoram mipuite Hmeichhiate Ni chibai a buk a, Hmasawna thuantling nei tur chuan hmeichhiate dinhmun chawikan a pawimawh takzet tih a sawi a ni.

MLA Pi Baryl Vanneihsang chuan he ni puala thuchah Akashvani kaltlanga sawiin, hmeichhia ten nih theih loh an nei lova, duhna tak tak an neih chuan an thei a, inlungualna leh induhsakna a pawimawh hle a ni a ti.

MHIP President Pi Ngurmawii Sailo pawhin Mizoram mipuite chu Hmeichhiate Ni chibai a buk a ni.

India Women Hockey Player Lalremsiami Hmar chuan Hmeichhiate Ni pualin Mizo mipuite chibai a buk bawk.

<><><>

GOVERNOR

Governor Gen (Retd) Vijay Kumar Singh-an hmalakna dik, hmanraw tha leh remchanna a awm phawt chuan tun ai hian nasa in Mizoramin hma a sawn thei a ni, a ti.

Governor hian nimin khan Siaha tlawhin, Smart Classroom project hnuaia ITI Ltd. leh Living Thoughts organisation te'n Numaligarh Refinery Limited (NRL) te Corporate Social Responsibility (CSR) fund kaltlanga an ruahman, Smart Board chu Siaha District chhunga Sikul thlan chhuah 6 te hman turin a hlan a, Sawrkar Department hotute leh zirtirtute a kawm bawk a ni.

Thusawiin Governor chuan ziak leh chhiar thiam leh mi taima tamna Mizoramin theihna nasa tak a neih thu sawiin, hmalakna dik a awm phawt chuan tun ai hian nasa takin Mizoramin hma a sawn thei a ni, a ti a. Mizoram sawrkar pawhin thingtlang kilhhawr zawka chengte hmasawn nan theihtawp a chhuah tih sawiin, official-te chu thil thar leh tha zawk, hmasawn nana pawimawhte ngaihtuaha a hnena thlen hreh lo turin a sawm a. Zirna chu exam hmachhawn nan mai nilo, nundan tha leh dik zirna a nih thu pawh sawiin, mipuite chu technology chhuak thar ber berte hlau mai lova hman tangkai tum zawk turin a chah a. Siaha District chu kimchang zawka tlawh leh ngei a tum thu a sawi bawk.

Prime Minister-in India ram hmun kilkhawr ber bera awmte pawhin ram chhung hmun dangte ruala hmasawinna an hmuh ve zel theih nana hmalak a ngaihpawimawh thu leh, hamthatna leh remchanna awmte pawh an neih zung zung theih nana tanlak a ngaihpawimawh thu sawiin, smart board sem pawh hi thingtlang kilkhawr zawk leh khawpuia cheng zirlaite hmasawinna kawnga intluktlanna tura ruahman a ni a, hei hian zirlaite hnenah zirna tha leh hlawhtlinna a pek ngei a beisei a ni, a ti.

Tanpuina dawngtu te hi Siaha District chhunga Sikul 6- Phura High School, Phura; Z.M High School, Chapi; Border High School, Laki; Siasi Middle School, Siasi; Theiva Middle School, Theiva leh Lopu Middle School, Lopu-te hnenah Smart Board hlan niin, hemi hma hian Lawngtlai District chhunga Sikul 14 ahte hlan a lo ni tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

CHAPCHAR KUT

Chief Minister Pu Lalduhoman Mizo pi leh pu te kha mi hawihhawm, aia upa zah leh piangsual hmusit ngai lo an ni a, chumi te thlah tunlai thangthar ten, social media hrang hrangah te tawngkam hawihhawm hmang se a ti.

Zofate kut ngaihhlut hlawh leh ropui ber, Chapchar Kut nimina Aizawla a hmanpuinaah he thu hi sawiin Chief Minister chuan Zofa hmun hrang hranga awmte chu taihmak chhuah lehzual theuh turin a chah a, sorkar hnathawk zawng zawng pawhin rim takin hna a thawk mek tih a sawi a. Zofa zawng zawng ten an eizawna theuhah, tih takzet an chhuah theuh chuan he hnam hi a ropui ang a, hnam ropuina tur chu taihmak a ni a ti.

Pu Lalduhoma chuan Mizo pui leh pute chu aia upa zah mi an nihna chu an hawihawmna mawi tak a ni tih a sawi a, tunlaiah office hna thawhnaah kum naupang zawkte chu hna sang thawk tam tak an awm tawh avangin hmanlai nun ang zawng zawng chu chhawm a rem lohna chen a awm tih a sawi a, chutihrualin a theihna chen chenah aia upa zahna chu lantir a pawimawh tih a sawi bawk.

<><><>

LUNGLEI ODOP

Sawrkhar laipui ruahmanna -One District One Product (ODOP), "District khat, thar chhuah chi khat" tih hnuaiah nimin khan Lunglei-a Chapchar Kut hmanaah balhla leh balhla atanga thilsiam chhuah hrang hran te phochhuah a ni.

Lungleia Chapchar Kut hmannaah hian Lunglei ODOP hmanga tualchhung siam chhuah ei tur chi hrang hrang chu Kut Nu, Health & Family Welfare Minister Pi Lalrinpuui lo lawm nan thilpekah hlan a ni a. Kut Thlengtu, District Bawrhsap Pi Navneet Mann chuan Kut Nu lawmna thilpek hi a hlan a ni.

Kut hmangtu mipuite tan sawrkhar department, pawl leh mimal te'n dawr chi hrang hrang hawngin, he'ng zingah hian District Horticulture Office chuan ODOP stall an hawng ve bawk a. He ODOP stall-ah hian Lungleia balhla aṭanga thil siam chhuaktu-te'n balhla aṭanga thil siam chi hrang hrang - in chi, kamram, chhangphut leh a dangte chu tlawm taka lei theih turin an chhawp chhuak a ni.

Hun hrang hrangah sawrkhar thuneitute, mi pawimawhte leh khual ṭhate an lo kal changin anmahni lo lawm nan thilpek lo hlan ṭhin a ni a. Hetiang nikhua hian Lunglei District-a khual ṭhate lawmna thilpek atan District ODOP balhla leh balhla aṭanga thil siamte lo hlan ṭhin ni se tia ODOP hma lakna hnuaia ruahman a nih angin, hun eng emaw lai aṭang khan balhla leh balhla aṭanga thil siam chi hrang hrangte chu thilpek atana inhlan hi chin chhoh a ni a. District ODOP chawi lar nan leh balhla hmanga ei zawna tihmasawn nan he thil hi chhunzawm zel tum a ni.

ODOP hnuaiah hian Lunglei District chhunga balhla thar chhuah leh balhla aṭanga thil siam chhuah tipung tur te, balhla chingtu leh balhla hmanga thil siam chhuaktu tam zawk an awm theihna tur leh hmanraw mamawh leh a hralhna ṭha zawk a awm zel theih nan te hma lak chhoh zel tum a ni bawk.

<><><>

UNION HM

Union Home Minister Amit Shah-a chuan Tamil tiamin tualto tawng regional language ti hmasawn zel turin sawrkarin theihtawp a chhuah thu a sawi. Nimina Tamil Nadu-a Ranipet district-a Central Industrial Security Force (CISF) din cham 56-na a hmanpuinaah he thu hi sawiin Pu Shaha chuan Tamil Nadu state ziarang leh hmun hluite humhalh a tul tih a sawi a. Prime Minister Narendra Modia chuan Tamil tawng leh hnam ziarang hlui tawh takte chu vawng nung tlat turin theihtawp a chhuah tih a sawi bawh a ni.

<><><>